

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 451505 23 St
Tuzla, 01.08.2024. godine

Općinski sud u Tuzli, stečajni sudija Vedran Milašinović, u stečajnom postupku nad stečajnim dužnikom „GRADAČAČKI SAJAM“ d.o.o. za priređivanje sajмова i izložbi Gradačac, ul. H.K. Gradašćevića bb, nakon provedenog stečajnog postupka, donio je dana 01.08.2024. godine sljedeće:

RJEŠENJE

OTVARA SE stečajni postupak nad imovinom dužnika „GRADAČAČKI SAJAM“ d.o.o. za priređivanje sajмова i izložbi Gradačac, ul. H.K. Gradašćevića bb, matični broj subjekta 1-949, JIB; 4209240800005, račun broj; 1321900100010164 NLB banka d.d. Sarajevo.

Za stečajnog upravnika imenuje se Senad Uzunić iz Tuzle.

ZAKLJUČUJE SE stečajni postupak nad imovinom dužnika „GRADAČAČKI SAJAM“ d.o.o. za priređivanje sajмова i izložbi Gradačac, ul. H.K. Gradašćevića bb, zbog nedostatka stečajne mase za pokriće troškova stečajnog postupka.

Rješenje će se objaviti na oglasnoj tabli suda, web stranici suda, Službenim novinama F BiH, te dostaviti FIA.

Pravne posljedice zaključenja stečajnog postupka nastupit će po proteku osam dana od dana objavljivanja rješenja u „Službenim novinama F BiH“, a pravosnažno rješenje će se dostaviti Odjelenju registra ovog suda, radi brisanja stečajnog dužnika iz sudskog registra.

Obrazloženje

Rješenjem Općinskog suda u Tuzli broj: 32 0 St 451505 23 St od 05.01.2024. godine, pokrenut je prethodni postupak radi utvrđivanja uslova za otvaranje stečajnog postupka nad imovinom društva „GRADAČAČKI SAJAM“ d.o.o. za priređivanje sajмова i izložbi Gradačac, ul. H.K. Gradašćevića bb, a za privremenog stečajnog upravnika imenovana je Senad Uzunić iz Tuzle, sve temeljem odredaba člana 61 Zakona o stečaju (Sl. novine F BiH 53/21).

Privremeni stečajni upravnik dostavio je izvještaj o provedenom prethodnom postupku ovom sudu dana 05.02.2024. godine. Iz izvještaja privremenog stečajnog upravnika i navoda datih na ročištu proizilazi da je djelatnost društva bila organizacija sajma pod nazivom Gradačački sajam šljive, te iznajmljivanje poslovnih prostora. Društvo je sa Općinom Gradačac ugovorilo zakup sportske hale 1996. godine, u kojoj ima više poslovnih prostora koje je stečajni dužnik davao u podzakup trećim licima (u pravilu sportskim klubovima i ugostiteljima), a jednom godišnje su u vlastitoj organizaciji pripremali i održavali sajam. Problemi u poslovanju su nastali tokom 2016. godine kada Grad Gradačac više nije htio da produži zakupni odnos te je podigao tužbu, a objekat sportska sala je 2021. godine predat u posjed Gradu Gradačac, a firma je zbog obustavljanja osnovne djelatnosti prekinula poslovanje. Kod društva su bili zaposleni radnici pretežno radi održavanja objekta i obavljanja ugostiteljskih djelatnosti, te je tokom 2020. godine bilo prijavljeno 8 radnika, koji su svi objavljeni 2021. godine, prema kojima po navodima ovlaštenog lica nisu ostala dugovanja na ime plata i doprinosa, s tim da iz dostupne dokumentacije nije bilo moguće utvrditi za koji period su uplaćeni posljednji doprinosi. Prema poslovnim knjigama obaveze iznose 419.614,00 KM, od čega se iznos od 413.884,00 KM odnosi na obaveze prema dobavljačima, odnosno prema Gradu Gradačac za zakup poslovne hale za šta je Grad Gradačac podnio tužbu i ishodio presudu u svoju korist. Tačan iznos obaveza bi mogao biti utvrđen tek u slučaju otvaranja stečajnog postupka i

podnošenja prijava potraživanja od strane stečajnih povjerilaca. Računi društva kod poslovnih banaka su ugašeni ili blokirani, društvo nije likvidno u kontinuitetu u posljednjih dvije godine. Društvo u svom vlasništvu nema nepokretnosti, pokretnih stvari, novčanih sredstava niti bilo koje druge imovine iz koje bi se mogli finansirati troškovi stečajnog postupka i namiriti povjerioci. U poslovnim knjigama društvo ima evidentirana potraživanja koja se u najvećem dijelu podnose na sportske klubove koji su iznajmljivali salu a nisu redovno plaćali najam, a naplata nije bila moguća s obzirom da nisu imali imovine, tako da su navedena potraživanja u svakom slučaju i zastarila.

Stečajni dužnik a što proizilazi iz izvještaja i mišljenja privremenog stečajnog upravnika nije u roku od 60 dana od dana nastupanja platežne nesposobnosti podnio prijedlog za otvaranje stečajnog postupka, a prema finansijskim izvještajima nelikvidnost odnosno gubitak iznad visine kapitala je evidentiran na dan 31.12.2021. godine (a prijedlog je podnio stečajni povjerilac 29.08.2023. godine).

Dakle, sud nalazi da je podneseni prijedlog dopušten i da postoji stečajni razlog za otvaranje stečajni postupka predviđen članom 6 stav 2 i članom 102 Zakona o stečaju.

U smislu odredbe člana 103 stav 1 Zakona o stečaju, a u vezi sa odredbom člana 102 stav 7 Zakona o stečaju F BiH, a budući da dužnik ne raspolaže sredstvima za vođenje stečajnog postupka iz kojih bi se mogli podmiriti troškovi stečajnog postupka, sud je rješenjem od 02.04.2024. godine pozvao predlagača, povjerioce i sva zainteresovana lica da u roku od 30 dana od dana objavljivanja poziva u službenim novinama uplate iznos od 5.000,00 KM na ime otvaranja stečajnog postupka, iz kojeg predumjmljenog iznosa bi se pokrili troškovi stečajnog postupka.

Rješenje kojim se pozivaju predlagač, povjerioci i sva zainteresovana lica, objavljeno je u Službenim novinama F BiH broj 28/24 dana 17.04.2024. godine, oglasnoj tabli suda dana 03.04.2024. godine i na web stranici suda, kojim se objavama javni poziv smatra dostavljenim.

S obzirom da u ostavljenom roku koji je propisan zakonom predlagač, povjerioci ili neko od zainteresovanih lica nisu izvršili uplatu predumja za obezbjeđenje troškova stečajnog postupka, sud je u smislu odredbe člana 102 stav 8 Zakona o stečaju, donio odluku o otvaranju i zaključenju stečajnog postupka, na način određen u izreci rješenja.

Temeljem odredbe člana 102 stav 8 Zakona o stečaju, rješenje o zaključenju stečajnog postupka dostavlja se nadležnom tužilaštvu Tuzlanskog kantona, Poreskoj upravi FBIH i Upravi za indirektno oporezivanje BiH.

Nadalje, temeljem odredbe člana 204 stav 1 i 3 Zakona o stečaju, a u vezi sa odredbom člana 190 stav 10 Zakona o stečaju, rješenje se ima objaviti na oglasnoj tabli suda, WEB stranici suda, Službenim novinama F BiH te dostaviti FIA, dok je odredbom člana 204 stav 2 istog zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama F BiH.

Odluka o brisanju pravnog lica iz javnih registara temelji se na odredbi člana 204 stav 5 Zakona o stečaju.

Na osnovu odredbe člana 206 stav 2 Zakona o stečaju, osnivač društva je dužan preuzeti arhivsku građu i istu predati nadležnom arhivu na čuvanje.

Temeljem odredbe člana 102 stav 8 Zakona o stečaju sud je odlučio kao u izreci rješenja.

Stečajni sudija
Vedran Milašinović

POUKA O PRAVU NA IZJAVLJIVANJE PRAVNOG LIJEKA:

Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu u Tuzli, putem ovog suda, u roku od 8 dana, od dana objavljivanja rješenja u Službenim novinama.